



Bentiarq Ottosen
Atassut

UKA 2023/118
17. oktober 2023

Arpattarfiit aammalu atletik atorlugu sungiusartarfiit allat nuna tamakkerlugu sananeqarsinnaaneriniq periarfissanik misissuinissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.
(Inatsisartunut Ilaasortaq Nivi Olsen, Demokraatit)

Siullermeenera

Kalaallit Nunaat timersornikkut siuariartorpoq, malitsigisaanillu aserfallatsaaliinikkut pitsanngorsaajuaannarnissaq pisariaqartinneqarluni. Timersorneq inuiaqatigiinni pingaarutilerujussuuvoq, tamatsinummi ataatsimoorsitsilertarnera uummatitsinnik qamangavik nukimmik nutaamik pilersitsisarnera attortinnaannartumik angusaqarfiusarpoq.

Ukiuni kingullerni Kalaallit timersornikkut nunanut allanut unammillersinnaalariartornerat naapertorlugu pisariaqartinneqarpoq timersornikkut atortutigut siuarsaanissaq, tamannalu Atassummiit peqataaffigisagippat isumaqarpugut. Malunnartorujussuuvoq timersornikkut angusarissaarsimatilluta uatsinnut nunaqqatitsinnullu nuannersumik misigisaqarfiusartoq, ataatsimoortitsilluartartoq. Tamannalu assortorneqarsinnaanngilaq timersornikkut siursaasoqartillugu timersoqatigiiffiit aamma kattuffiit attuumassuteqartut qanimut oqaloqatigilluarnissaat, pisortanut utaqqiinnannginnissaq eqqarsaatigalugu anguniarneqartariaqartoq. Kisiannilu periarfissat assorsuaq ajornakusoortarsimappat aningaasaliissussarsiornikkut assigisaanillu attuumassuteqarsinnaasunik suliaqarniarnikkut.

Atassummiit timersortartut suqaluartunillu timersornerup iluani timersuuteqartut tamakkiisumik tapersorsorpagut, pingaaruteqaqaarmi meeqqap meeranermiit inersimasunngornissaa tikillugu timersuut soqutigisaaq ingerlatiinnarnissaa.

Nammineerlunga timersortartutut oqaatigissavara, meeraallungali timersorneq soqutigisarsuara ulloq manna tikillugu timersuutigaara. Taamatut maligassiunissaq meeqqamut pingaaruteqarlunnarpoq, tassami meeqqap nuannaartorisani malersorlugu timersuut soqutigisaaq aalluttarpaa.

Maani politikernitsinni qanoq pitsaatigissagaluarpa tamatta ataatsimoorfeqarluta nukinik nutaanik pilersitsinissarput anguniarutsigu? Immaqa tamatta isummat assigiinngisitaartut atorlugit angusassagut annertuinngussagaluarput. Kalaallit Nunaat ataatsimoortoq inoqarfiit mikinerniit inoqarfiit anginernut angusaaq ataasiusoq anguneqarsimasinnaagaluarpoq, kisianni nalunngilarput tamanna anguneqarsinnaanngitsoq.

Una siunnersuut pitsaasumik kinguneqassasoq isumaqarpunga, aamma malitsigisaanik timersornikkut ineriartorneq ingerlalluarnernulernissaa naatsorsuutigaara. Taamaamaat siunnersuut tamakkiisumik taperserlugu kultureqarnermut ilinniartitaanermut, ilisimatusarnermut. Ilageeqarnermullu ataatsimiititaliamut innersuupparput.